

የሃንሰ ጻፊዳ ኮይር ኪታ ገሉዋ

የሱስ ኪቲዳ የሃንሰ ጻፊዳ ኮይር ኪታይ፡ ላኡ ሁጳ ቆፋቱዋ ኦይቄዳ፤ ሄዋንቱካ፡ ናባብያዋንቶ ጸሳናን እ ናኦ የሱስ ክርስቶሳና እትጥተላይ ደእናዳን መገፍሳናሳን ሀ እትጥተላ ጳይሳናው ዳንዳይያ ዋርዶ ትምርትያጥ ኡንቱንቱ ሃካና ማላ፡ ምንሲደ እኬክሳናሳ፡ ሄ ዋደ ደንዴዳ ዋርዶ ትምርቲ “ኢታተላይ ፑልትያዌ ሀ ኑን ደእያ ዋልቃማ አላምያና ጋከትያ ጋከላና ግድያ ድራው፡ ጸሳ ናእይ የሱስ ሙለካ እሳ ግዳናው ዋይ፡ አሳተላ ኤሻይ አው ደእናው ዳንዳየና” ያግያዋ፡፡ ሄ አስታማራቱ፡ “አቶተላ ጉሳይ አላምያ ደኑ ኡንኤትያዋጥ ላእ ከሰያዋ” ያገኛ፡፡ ሄዋ ቦላካ ቃይ “ኢታነ ከካ ሻኪደ ኦይቄያዋ ዋይ፡ ሀራ አሳው ሲቁዋ በሰያዋ ግድገካ፡ አቶተላና ኡንቱንታ ጋልያባይ ባዋ” ያገኛ፡፡

ጻፊ ሀ ትምርትያ ኤቀቲደ፡ “የሱስ ክርስቶስ ፖሎ አሳ፤ የሱሳን አማንያዋንቱን ጸሳ ሲቅያዋንቱ ኡባይ ባርንቱ ግድገካ እቲ እቲዋና ሲቀታናው በሴ” ያገደ ኑዴዳ፡፡

ሸምጋቱዋ ኡባቶ አመቴዳ ቃንሳ ቆፋቱዋ

- ገሉዋ 1:1-4
- ፖኡዋን ጳማ 1:5—2:29
- ጸሳ ናናን ጸላህያ ናና 3:1-24
- ቱሙዋን ባለሉዋ 4:1-6
- ሲቁዋ ኦሱዋ 4:7-21
- ጸንያ አማኑዋ 5:1-21

ደኡዋ ቃላ

1 ኑን ኮይሩዋጥ ደሚደ ደእያ፡ ኑ አይፍያን በኢደ፡ ኑ ኩሽያን አ ቦቾ በኤዳ ደኡዋ ቃላባ ህንተንቶ ጻፊቶ፡፡ ኑን አ በኤደ፤ ኑ ኩሽካ አ ቦቾ በኤዳ፡፡

2 ሄ ደኡ ቆንጮና፡ ኑን አ በኢደ፡ አባ ህንተንቶ ማርካቲቶ፤ ቃይ ጸሳ አዉዋ ማታን ደእያ ኑዉ ቆንጮዳ መድና ደኡዋባ ህንተንቶ ኑዴቶ፡፡

3 ቃይ ኑናና ህንተንቶ እትተላይ ደእና ማላ፡ ኑን በኤዳዋን ሰሴዳዋ ህንተንቶ ኑዴቶ፤ ኑወ አወዋናን አ ናኣ የሱሰ ክርሰቶሳና እትተላይ ደኤ።

4 ኑን ኑ ናሸቻይ ፖለታና ማላ፡ ሀዋ ህንተንቶ ጸፊቶ።

ጸሓይ ፖኤዋ

5 ኑን ጸሓ ናአፕ ሰሲደ፡ ህንተንቶ ኑድያ ኪታይ፡ “ጸሓይ ፖኤዋ፤ እን ጴማይ ሙለካ ባዋ” ያግያዋ።

6 ኑን ኑወ እናና እትተላይ ደኤ ገደ ጴማን ደአፕ፡ ኑ ሃሳያንን ኑ ኑሱዋን ዋርድቲቶ።

7 ሸን ፖኤዋን አ ደእያዋዳን፡ ኑንካ ፖኤዋን ደአፕ፡ ኑወ እቶ እቱዋና እትተላይ ደኤ፤ ቃይ አ ናኣ፡ የሱሰ ክርሰቶሳ ሱላይ ናጋራ ኡባፕ ኑና ጌሼ።

8 ኑን ናጋራ አሰበይኮ ጎፕ፡ ኑረካ ኑና ጭሜቶ፤ ኑናን ቱማተላይካ ባዋ።

9 ሸን ኑን ጸሓዉ ኑ ናጋራ ፓጸፕ፡ እ ኑ ናጋራ አቶ ጋናዉን ኑ ባይዞ ኑሱዋ ኡባፕ ኑና ጌሻናዉ፡ አማነትያዋን ቱሙዋ አላያዋ።

10 ኑን ናጋራ አሰበይኮ ጎፕ፡ ጸሓ ዋርዲዋ ጌቶ፤ አ ቃላይካ ኑ ዋዛናን ደኤና።

2

ክርሰቶሰ ኑወ ጋናትያዋ

1 ታ ናቶ፡ ናጋራ ህንተ ኡፍናዳን፡ ታን ሀዋ ህንተንቶ ጸፋይ፤ ሸን ኡንን ናጋራ አላፕ፡ አዉዋ ማታን ኑወ ጋናትያ የሱሰ ክርሰቶሰ፡ ጽሉ፡ ደኤ።

2 ቃይ ኑን ኑ ናጋራ አቶ ጌተቱሳ ክርሰቶሳ ባጋና ደሜቶ፤ ክርሰቶሰ ያርሸቲዳዌ አሳ ኡባ ናጋራ ድጋናሳፕ አትን፡ ኑ ናጋራ ጸላላ ድጋናሳ ግደና።

3 ኑን ጸሓ አዛዙዋ ናጎፕ፡ ቱሙ አ ኤርያዋ ሄዋን ሻካናዉ ዳንዳዬቶ።

4 እት ኡራይ፡ “ታን አ ኡራይ” ገደ፡ ቃይ አ አዛዙዋ ናገናን አጎፕ፡ ሄ ኡራይ ዋርዲዋ፤ ቱማተላይካ እን ባዋ።

5 ሸን አ ቃላዉ አዛዘትያ ኦና ግደፕን፡ ሄ ኡራይ ጸሓ ሲቅያዌ ቱሙ ፖለቲዳ፡ ኑን ጸሓን ደእያዋ ሀዌ ኑና ኤርሴ። ሄዌካ፡

6 “ታን፡ ጸሓን ደአይ” ግያ ኡንን ክርሰቶሰ ደኤዳዋዳን ደአናዉ በሴ።

ኦራላ አዛዙዋ

7 ታ ሲቃቶ፣ ታን ህንተንቶ ኮይሩዋፕ ደእያ ኤጫ አዛዙዋ ጸፋይፕ እትን፣ ኦራላ አዛዙዋ ጸፍከ፤ ሄ ኤጫ አዛዙ ህንተ ሰሴዳ ቃላ።

8 ግደፕካ፣ ታን ህንተንቶ ላኤንሉዋ ኦራላ አዛዙዋ ጸፋይ፤ ሄ አዛዙዋ ቱማተላይካ ክርሰቶሳን ህንተናን ቤቴ። እያዉ ሳፕ፣ ጳማይ ጳዩ፤ ቱሙ ፖኡ ሀእ ፖኤ።

9 ፖኡዋን ደእይ ጊደ፣ ባረ እሻ እጽያ ኦን ሀኖ ጋካናዉካ ጳማን ደኤ።

10 ባረ እሻ ሲቅያ ኦን ፖኡዋን ደኤ፤ ሄ ኡራን ሀራ ኡራ ጳቢያባይ እያይን ባዋ።

11 ሽን ባረ እሻ እጽያ ኦን ጳማን ደኤ፤ ጳማን ሀመቱ። ጳማይ ኦ አይፍያ ቆቅሰ ዋሴዳ ድራዉ፣ ሀቃ ብንቶን ኤረና።

12 ታ ናቶ፣ ጸሳይ ክርሰቶሳ ሱንላ ድራዉ።

ህንተ ናጋራ አቶ ያጌዳ ድራዉ።

ታን ህንተንቶ ጸፋይ።

13 አዋቶ፣ ኮይሩዋፕ ደእያዋ ህንተ ኤሬዳ ድራዉ።

ህንተንቶ ጸፋይ።

ያላጋቶ፣

ጸላህያ ካፑዋ ህንተ ጸኔዳ ድራዉ።

ህንተንቶ ጸፋይ።

ጉላ ናቶ፣ ጸሳ አዉዋ ህንተ ኤሬዳ ድራዉ።

ህንተንቶ ጸፋይ።

14 አዋቶ፣ ኮይሩዋፕ ደእያዋ ህንተ ኤሬዳ ድራዉ።

ህንተንቶ ጸፋይ።

ያላጋቶ፣

ህንተ ሞኖ ግድያ ድራዉን

ጸሳ ቃላይ ህንተናን ደእያ ድራዉ።

ቃይ ጸላህያ ካፑዋ ህንተ ጸኔዳ ድራዉ።

ህንተንቶ ጸፋይ።

15 ሀ አላምያ ዎይ አላምያን ደእያ እያን ሲቆፕተ። ህንተ ሀ አላምያ ሲቆፕ፣ ጸሳ ሲቆ ህንተናን ባዋ።

16 እያዉ ሳፕ፣ ሀ አላምያን ደእያ ኡባባይ፣ ሄዌካ፣ አሳተላ አሙ፣ አይፍያን ጸሊደ ካጃልያዌን ባረ ደእያዋን ጨቀትያዌ ሀ አላምያፕ ዬዳዋፕ አትን፣ ጸሳፕ ይቤና።

17 ሀ አላሚን ሀ አላምያን አሳይ አሞትያ ኡባባይ አዳና። ሽን ጸሳይ ጌዳዋ ኦልያ ኡራይ መድናዉ ደእና።

ክርስቶስ ኤቀትያዋፕ ናገትያዋ

18 ታ ናቶ፡ ዎድያ ወርሰላይ ማታቴዳ፤ ክርስቶስ ኤቀትያዋ ሰንላፕ ያናዋ ህንተ ሰሴዳዋዳን፡ ሀራይ አቶ ሀእካ አ ኤቀትያዋንቱ ጮራቱ ደንዴድኖ። ሄዋ ድራዉ፡ ዎድያ ወርሰላይ ማታቴዳዋ ኩን ሄዋን ኤራቶ።

19 ሀ ኤቀትያዋንቱ ኑ ባጋ ግደና ድራዉ፡ ኑ ግደፕ ከሴድኖ፤ አያዉ ጎፕ፡ ኡንቱንቱ ኑ ባጋ ግድያባ ግድንቶን፡ ኑ ግደን ደእና፤ ሸን ኡንቱንቱፕ ኦንነ ኑ ባጋ ግደናዌ ኤረታና ማላ፡ ኑ ግደፕ ከሴድኖ።

20 ሸን ክርስቶስ ህንተ ቦላ ጌሻ አያና ጉሴዳ፤ ቃይ ህንተ ኡባይ ቱሙዋ ኤሪታ።

21 ቱሙዋ ህንተ ኤርያ ድራዉነ ቃይ ቱሙዋን ዎርዱ አያይነ ባይናዋ ህንተ ኤርያ ድራዉ፡ ታን ህንተንቶ ጻፋይፕ አትን፡ ቱሙዋ ህንተ ኤረና ድራዉ ጻፍከ።

22 የሱስ ኦከቴዳ ክርስቶስ ግድያዋ ኤርከ ግያ ኡራፕ አትን፡ ዎርዱ ኦኔ? ሄዌ ጸሳ አዉዋነ ናኦ ኤርከ ግያዌ ክርስቶስ ኤቀትያዋ።

23 ጸሳ ናኦ ኤርከ ግያ ኦናነ ጸሳ አዉካ ኤረና፤ ጸሳ ናኦ ኤራይ ግያ ኦናነ ቃይ ጸሳ አዉካ ኤሬ።

24 ሄዋ ድራዉ፡ ኮይሩዋፕ ህንተ ሰሴዳዋ ህንተ ዎዛናን ምንሲደ ናግተ። ኮይሩዋፕ ሰሴዳዋ ህንተ ናጎፕ፡ ህንተንቶ ቃይ ጸሳ ናኦናነ ጸሳ አዉዋና እትፕተላይ ደእና።

25 ቃይ ክርስቶስ ባረ ሁጳዉ ኑዉ እማና ጌዳዌ መድና ደኡዋ።

26 ታን ሀዋ ህንተንቶ ሄ ህንተና ባለሉያ አሳቱዋ ድራዉ ጻፋድ።

27 ሸን ክርስቶስ ህንተ ቦላ ባረ ጌሻ አያና ጉሴዳ። ጌሻ አያናይ ህንተናን ደእያ ድራዉ፡ ኦንነ ህንተና ታማርሳና ኮሸና፤ አያዉ ጎፕ፡ አ ጌሻ አያናይ ህንተና ኡባባ ታማርሴ። እ ታማርሳያዌ ቱሙዋፕ አትን ዎርዱዋ ግደና። ሄዋ ድራዉ አያና ጌሻ ትምርተዉ አዛዘቲደ፡ ክርስቶስና እትፕተላን ደእተ።

28 ታ ናቶ፡ ቃይ እ ቆንጭያ ዎደ፡ ኩን ያሽ ባይናዋንታ ግዳናዳንነ፡ አ ዩሳ ጋላስ አ ሰንላን ኩን ዬላተናዳን፡ አናና እትፕተላን ደእተ።

29 ክርስቶስ ጽሎ ግድያዋ ህንተ ኤርፕ፡ ጽሎባ ኦሉያ ኡባይ ጸሳ ናኦ ግድያዋ ኤራናዉ በሴ።

3

ጸሓፊ ርዕስ

1 ኑን ጸሓፊ ርዕስ ጌተቲደ ጸሐፊና ማላ፡ ጸሓፊ ኑና አይ ኬና ሲቋደንቶነ በእተ፡ ኑን ቱሙካ እ ርዕስ፡፡ ሀ አላሚ ጸሓፊ ኤረና ድራው፡ ኑናካ ኤረና፡፡

2 ታ ሲቃቶ፡ ሀእ ኑን ጸሓፊ ርዕስ፤ ኑን አያ ሀናነንቶ ብር ኤረትቤና፤ ሸን ክርሰቶሰ ቆንጭያ ዎደ፡ ኑን አ ማላታናዎ ኤሬቶ፡፡ አያው ጎፕ፡ እ ቱሙ አ ግድያዎ ኑን ኩሙንላን በእና፡፡

3 ቃይ ክርሰቶሳ በእና ጊደ ናሸቻን ናግያ ኦንነ ክርሰቶሰ ጌሻ ግዴዳዎዳን፡ ባረና ጌሼ፡፡

4 ናጋራ ኦሳያ ኡባይ ጸሓፊ ሀግያ ሙንሌ፤ አያው ጎፕ፡ ናጋራይ ጸሓፊ ሀግያ ሙንሌሳ፡፡

5 ክርሰቶሰ አሳ ናጋራ ጳይሳናው ቆንጭዳዎ ህንተ ኤሪታ፤ አን ናጋራይ ባዎ፡፡

6 ክርሰቶሳን ደእያ ኦንነ ናጋራ ኦሳደ ደኤና፤ ቃይ ናጋራ ኦሳደ ደእያ ኦንነ አ በእቤና ዎይ ኤርቤና፡፡

7 ታ ናቶ፡ ኦንነ ህንተና ባለሉ፡፡ ክርሰቶሰ ጽሎ ግድያዎዳን፡ ጽሎባ ኦሳያ ኡራይ ጽሎዎ፡፡

8 ጸሓፊ ካፕ ኮይሩዎፕ ናጋራ ኦሳዳ ድራው፡ ናጋራ ኡባ ዎደ ኦሳያ ኡራይ ጸሓፊ ካፕዎሳ፤ ሄዎ ድራው፡ ጸሓፊ ናክይ ጸሓፊ ካፕዎ ኦሱዎ ጳይሳናው ቆንጭዳ፡፡

9 ጸሓፊ ርዕስ ግድያ ኡባይ ጸሓፊ ሙጋታይ ኡንቱንቱን ደእያ ድራው፡ ናጋራ ኡባ ዎደ ኦሳዳ፤ ቃይ ጸሓፊ ኡንቱንቱ አዉዎ ግድያ ድራው፡ ናጋራ ኦሳናው ዳንዳይክና፡፡

10 ጸሓፊ ርዕስ ግድያን ጸሓፊ ካፕዎ ርዕስ ግድያ ደእያ ዲማተላይ ሀዎን ኤረቲ፤ ጽሎባ ኡጋናዎንቱን ዎይ ባረ እሻ ሲቀናዎንቱ ኦንነ ጸሓፊ ርዕስ ግድያ፡፡

እቱ እቱዎና ሲቀትያዎ

11 አያው ጎፕ፡ ኮይሩዎፕ ህንተ ሰሴዳ ኪታይ፡ “እቱ እቱዎና ሲቀታናው በሴ” ያግያዎ፡፡

12 ኑን ቃይሳ ማላ ግዳናው በሰና፡፡ ቃይሳ ጸሓፊ ካፕዎሳ፤ ሄዎ ግድ ድራው፡ ባረ እሻ ዎደዳ፡፡ እ ባረ እሻ አያው ዎደዳ? እ ኦሳዳ ኦሱ ኢታ ግድና፡ አ እሻይ ኦሳዳ ኦሱ ሎኦ ግዳዳ ድራው ዎደዳ፡፡

3:1 የሃ. 1:12 3:5 የሃ. 1:29 3:11 የሃ. 13:34 3:12 ደመላ 4:8

13 ታናዳን ጸሳ ካልያዋንቶ፡ ሀ ሳኣ አሳይ ህንተና እጸፕ፡ ኦራላባ ጎፕተ።

14 ኩን አማንያዋንታ ሲቅያ ድራዉ፡ ሀይቁዋፕ ደኦ ፕኔዳዋ ኤራቶ፤ አማንያዋንታ ሲቀና ኡራይ ኦንነ ሀይቁዋ ግደን ደኤ።

15 አማንያዋንታ እጽያ ኦንነ ሸምፑዋ ዋጄዳዋ፤ ቃይ ሸምፑዋ ዋጄዳዋን መድና ደኤ ባይናዋ ህንተ ኤሪታ።

16 ክርሰቶሰ ባረ ሸምፑዋ ኑ ድራዉ አሊደ እሜዳዋን ሲቁ አየንቶ ኩን ኤራደ፤ ኩንካ አማንያዋንቱ ድራዉ፡ ኑ ሸምፑዋ አሊደ እማናዉ በሴ።

17 ሸን ዲረ አሳይ ኦንነ ባረ እሻይ መቶትያዋ በኢደ፡ አዉ ቃረተናን እጸፕ፡ ባረ ዋዛናን ጸሳ ሲቃይ ጋናዉ ዋን ዳንዳዪ?

18 ታ ናቶ፡ ኩን ኦሱዋንነ ቱማተላን ሲቀቶይተፕ አትን፡ ጮ ሃሳያን ዋይ ቦላ ዶናን ሲቀታናዉ በሰና።

ጸሳ ሰንላን አማነቲደ ኤቂያዋ

19-20 ኩን ቱሙዋ ባጋን ደእያዋ ሄዋን ኤራና፤ ቃይ ኑ ዋዛናይ ኑ ቦላ ፕርድያ ዋደ ኡባን፡ ጸሳ ሰንላን ቱማተላ ኑና ሄዋን ኤርሴ። አያዉ ጎፕ፡ ጸሳይ ኑ ዋዛናፕ ዋልቃማ፤ ቃይ እ ኡባባ ኤሬ።

21 ታ ሲቃቶ፡ ኑ ዋዛናይ ኑ ቦላ ፕርደናዋ ግደፕ፡ ኩን ጸሳ ሰንላን ያዮኩ።

22 ኩን አ አዛዙዋ ናግያ ድራዉነ አ ናሽቶያባ ኦልያ ድራዉ፡ ዋሰያ ኡባባ አፕ እኬቶ።

23 ጸሳ አዛዙ ሀዋ፡ ክርሰቶሰ ኑና አዛዜዳዋዳንካ፡ ጸሳ ናኣ የሱሰ ክርሰቶሳ ሱንላን ኩን አማናናዳንነ እቱ እቱዋና ሲቀታናዳን ጸሳይ ኑና አዛዜዳ።

24 ጸሳ አዛዙዋ ናግያ ኦንነ ጸሳ ግደን ደኤ፤ ጸሳይካ አ ግደን ደኤ፤ ጸሳይ ኑዉ እሜዳ አ አያና ባጋና እ ኑ ግደን ደእያዋ ኩን ኤራቶ።

4

ቱማንቻ አያናን ዋርዶ አያና

1 ታ ሲቆቶ፡ ጸሳ አያናይ ታናን ደኤ ግያ ኡባ አማኖፕተ፤ ሸን ኡንቱንቱን ደእያ አያናይ ጸሳፔየ ዋይ ግደነንቶ ፓጭተ። አያዉ ጎፕ፡ ጮራ ዋርዶ ናባቱ ኡባሳ ቤድኖ።

2 ጸሳ አያና ግድያዋ ህንተ ሀዋን ኤራና፤ “የሱሰ ክርሰቶሰ አሳ ግዲደ ዬዳዋ አማናይ” ግያ ኦናንነ ደእያ አያናይ ኡባይ ጸሳፕ ዬ።

3 ቃይ ክርስቶስ አሳ ግዲደ ዬዳዋ አማናይ ጌናዋ አያናይ ኡባይ ጸሳጥ ይቤና፤ እን ክርስቶሳ ኤቀትያ አያናይ ደኤ። ህንተ ሄዌ ያናዋ ካሰ ሰሴድታ፤ እ ሀራይ አቶ ሀእካ ሀ አላምንን ደኤ።

4 ታ ናቶ፣ ህንተ ጸሳዋንታ፤ ህንተ ግድን ደእያ ጌሻ አያናይ ሀ አላምንን ደእያ አያናጥ ዳሮ ዎልቃምያ ድራው፣ ዎርዶ ናባቱዎ ህንተ ጸኔድታ።

5 ኡንቱንቱ ሀ አላምን አሳ ግድያ ድራው፣ ሀ አላምንሳ ሃሳዪኖ፤ ሀ አላምን አሳይካ ኡንቱንቱ ሃሳያ ሰሴ።

6 ኑን ጸሳዋንታ፤ ጸሳ ኤርያ ኡን ኑን ግያዎ ሰሴ። ጸሳ ኤረና ኡን ኑን ግያዎ ሰሰና። ኑን ቱሙ አያናን ዎርዶ አያና ሄዋን ሻኬቶ።

ጸሳይ ሲቁዎ

7 ታ ሲቃቶ፣ ሲቁ ጸሳጥ ይያ ድራው፣ እን እቱ እቱዋና ሲቀቶይተ። ሲቀትያ ኡን ጸሳ ናና፤ ጸሳካ ኤሪኖ።

8 ጸሳ ኤሻይ ሲቆ ግድያ ድራው፣ ሲቀና ኡራይ ኡን ጸሳ ኤረና።

9 ጸሳይ ኑና ባረ ሲቁዎ ሀዋን በሴዳ፤ ኑን አ ባጋና ደኡዎ ደማና ማላ፣ ባረ እት ናኦ ሀ አላምን ኪቲዳ።

10 ሲቁዎ ግያዌ ሀዋ፤ ጸሳይ ኑና ሲቁደ፣ ኑን ኑ ናጋራጥ ማሮተላ ደሜዳ ባረ ናኦ ኑወ ኪቲዳጥ አትን፣ ኑን አ ሲቁዳዋና ግደና።

11 ታ ሲቆቶ፣ ጸሳይ ኑና ሀዋዳን ሲቁዳዎ ግደጥ፣ ኑንካ እቱ እቱዋና ሲቀታናዉ በሴ።

12 ጸሳ ኡን ሙለካ በእቤና፤ ኑን እቱ እቱዋና ሲቀቶጥ፣ ጸሳይ ኑ ግድን ደኤ፤ አ ሲቁካ ኑ ግድን ፖለቲዳ።

13 ጸሳይ ባረ አያና ኑወ እሜዳ ድራው፣ ኑን ጸሳ ግድን ደእያዋን እካ ኑ ግድን ደእያዎ ኤሬቶ።

14 ጸሳ አዉ ባረ ናኦ ሀ አላምን አሸያዎ ግዳናዉ ኪቲዳዎ ኑን በኢደ ማርካቲቶ።

15 የሱሰ ጸሳ ናኦ ግድያዎ ማርካትያ ኦ ግዲዋን ጸሳይ ደኤ፤ እካ ጸሳ ግድን ደኤ።

16 ጸሳይ ኑና ሲቅያዎ ኑን ኑ ሁጳዉ ኤሬቶን አማኔቶ። ጸሳይ ሲቁዎ። ሲቁዋን ደእያ ኡን ጸሳ ግድን ደኤ፤ ጸሳይካ አ ግድን ደኤ።

17 ኑ ደኡ ሀ አላምንን ክርስቶስ ደኤዳዎ ማላ ግድያ ድራው፣ ፕርዳ ጋላሰ ኑን ያየና ማላ፣ ሲቁ ኑ ግድን ፖለቲዳ።

18 ሲቁዋን ያሽ ባዎ፤ ጋሱካ ቱሙ ሲቁ ያሻ ከሰ ኦሌ። ያሻይን ሙራይ እትጥ ብያ ድራው፣ ያይያ ኡራ ሲቁ ኩሙንላ ግደና።

19 ጸሳይ ኮይሮ ኑና ሲቁዳ ድራው፣ ኑን አ ሲቁደ።

20 ኦንነ፡ “ታን ጸሳ ሲቃይ” ጊደ ባረ እሻ እጾ፡ እ ምርዱም።
እያው ጎ፡ በኤዳ ባረ እሻ ሲቀናዌ በእቤና ጸሳ ሲቃናው ዋን ዳንዳዪ?

21 ቃይ ክርስቶስ ኑው እሜዳ አዛዙ ሀዋ፤ ጸሳ ሲቅያ ኡራይ ባረ እሻካ ሲቃናው በሴ።

5

ሀ አላምያ ጸንያዋ

1 ኦከቴዳ ክርስቶሳ ያጊደ፡ የሱሳ አማንያ ኡባይ ጸሳ ናና፤ ቃይ ጸሳ አውዋ ሲቅያ ኦንነ አ ናናቴዋካ ሲቁ።

2 ኑን ጸሳ ሲቅያዋንነ አ አዛዙዋ ናግያዋን፡ ጸሳ ናናቴዋ ሲቅያዋ ኤራቶ።

3 እያው ጎ፡ ኑን ጸሳ ሲቅያዌ አ አዛዙዋ ናግያዋ፤ አ አዛዙካ ዴጾ ግደና።

4 እያው ጎ፡ ጸሳ ናኦ ግድያ ኦንነ ሀ አላምያ ጸናናው ዳንዳዪ፤ ኑንካ ሀ አላምያ ጸናናዌ ኑ አማኑዋና።

5 ሀ አላምያ ጸናናው ዳንዳይያዌ ኦኔ? የሱስ ጸሳ ናኦ ግድያዋ አማንያዋ ጸላላይ ጸናና።

ክርስቶሳዋ ማርካቴዳዋ

6 ጽንቃታ ሃላናነ ሀይቁዋ ሱላና ዬዳዌ ሀዋ፤ እካ የሱስ ክርስቶሳ፤ ሃላናነ ሱላና* እ ዬዳዋ፡ አትን፡ ሃላ ጸላላና ይቤና። ጌሻ እያናይ ቱማ ግድያ ድራው፡ ሃዌ ቱማ ግድያዋ አ ባረ ሁጳው ማርካቴ።

7 እያው ጎ፡ ሄዙ ማርካቴ ደኢኖ።

8 ሄዋንቱ፡ ጸሳ አያና፡ ሃላነ ሱላ፤ ሀ ሄዛቱ እቱ እቱዋዋ ጳልቁክኖ።

9 ኑን አሳይ ማርካትያዋ አማኖ፡ ጸሳይ ማርካትያዌ አሳዋ፡ ሎይላ አጼ፤ እያው ጎ፡ ጸሳይ ባረ ናኦ ማርካቴዳ ማርካተላይ ሀዋ።

10 ጸሳ ናኦ አማንያ ኡራ ዋዛናን ሀ ማርካተላይ ደኤ። ጸሳ አማንና ኡራይ ኦንነ ጸሳይ ባረ ናኦው ማርካቴዳ ማርካተላ አማንቤና ድራው፡ ጸሳ ምርዱዋ ጌ።

11 ሰም ማርካተላይ ሀዋ፤ ጸሳይ ኑው መድና ደኤዋ እሜዳ፤ ሄዌካ አ ናኦን ደኤ።

* 5:6 ሃላናነ ሱላና፡ የሱስ ሀ አላምያ ዬደ ጽንቃታ ሃላ ጸላላና ግደናን ባረ ሀይቁዋ ሱላን ዬዳ። ሄዋ ጉሳይ አ አሳ ኩሽያን ጸማቱሳ ጸላላ ግደናን፡ ሀ አላምያን ሀይቁዳ ጉሳ።

12 ጸሳ ናአይ ደእያ ኦሰነ ደኡ ደኤ፤ ጸሳ ናአይ ባይና ኦሰነ ደኡ ባዋ።

መድና ደኡዋ

13 ጸሳ ናአ ሰንሳን አማንያ ህንተንቶ መድና ደኡ ደእያዋ ህንተ ኤራና ማላ። ሀዋ ህንተንቶ ጸፋድ።

14 ጸሳይ ኮይያዋዳን፣ አይነ ኑን አ ዋሶ፣ እ ሰሰያዋ ኑን ኤርያ ድራዉ፣ እ ሰንሳን ያዮኮ።

15 ኑን ዋሰያ ኡባን እ ሰሰያዋ ኤርፕ፣ ኑን አ ዋሴዳዋ እ ዛሬዳዋ ኤሬቶ።

16 ኦንነ ሀይቁ በሰና ናጋራ ባረ እሻይ ኦሐሽን በኦፕ፣ ጸሳ ዋሳናዉ በሴ፤ ሀይቁ በሰና ናጋራ ኦሐዳዋንቶ ጸሳይ ደኡዋ አማና። ሀይቁ በሰያ ናጋራይ ደኤ፤ ታን ህንተና ሄዋ ጸሳ ዋሰተ ጊከ።

17 ባይዘ ኦሱ ኡባይ ናጋራ፤ ሽን ሀይቁ በሰና ናጋራይ ደኤ።

18 ጸሳ ናናይ ኦንነ ናጋራ ኡባ ዋደ ኦፍዋ ኑን ኤሬቶ። አያዉ ጎፕ፣ ጸሳ ናአይ ኡንቱንታ ናጌ፤ ቃይ ጸላህያ ካፑካ ኡንቱንታ ቆሀናዉ ዳንዳየና።

19 ኑን ጸሳዋንታ ግድያዋነ ሀ አላሚ ኡባይ ጸላህያ ካፑዋን ዋደቴዳዋ ኤሬቶ።

20 ኑን ቱሙ ጸሳ ኤራናዳን፣ ጸሳ ናአይ ዬዳዋነ ኑዉ እኬካ እሚዳዋ ኤሬቶ። ኑን ቱሙ ጸሳ ግድን፣ እ ናአ የሱሰ ክርሰቶሳ ግድን ደኤቶ፤ እ ቱሙ ጸሳነ መድና ደኡዋ።

21 ታ ናቶ፣ ኤቃቱዋፕ ህንተ ሁጲያ ናግተ።

ጌሻ ማጻፋ

The Holy Bible in the Dawro language of Ethiopia

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011-2024, Wycliffe Bible Translators, Inc. and The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c